

DORCINCA Britanniae ciuitas Bedæ lib. 3. cap. 7. vulgò *Dorchester*, alijs Dorcestria, in regione Occidentalium Saxonum, qui *Birinum* eius primum Episcopum fuisse tradit sub Kinigisto illorum Rege ad fidem Christi conuerso.

VENTA Bedæ ibidem, vulgò *Winchester*, ciuitas Occidentalium Saxonum, qui diuisa Sede Dorcinenſi sub Cenwalcho Rege *Winam* huius Episcopum fuisse scribit. Wintonia postea dicta est, traditque Godvvinus libro de Episcopis Angliæ ex vetusto Cod. MS. Lucium primum huius Insulæ Regem Christianum in ea sedem Episcopalem institui curasse.

DVMMOK Bedæ lib. 2. cap. 15. Dunwicus creditur, Britanniae ciuitas Episcopalis ad mare in Orientali Suffolciæ parte, cuius primus Episcopus *Felix* ad instantiam Carpwaldi Orientalium Saxonum Regis institutus est, anno Christi 635. teste eodem Beda: & ab eo postea *Felixstowe*, quasi Felicis oppidum, appellata est.

HELMHAM, oppidulum Britanniae, in fastis Episcop. Angliæ, Venerabilis Bedæ *Northelmham*, vbi diuisa Dunwicensi diœcesi, sedes Episcopalis constituta est, cuius primus Episcopus *Bedvinnus* fuit, & quæ postea Thetfordiam, indeque Nortwicum translata dicitur.

LICHFELDIA Britanniae ciuitas in Mercia Mediterranea, vulgò *Leichfeld*, vbi Oswius Merciorum Rex Episcopalem sedem institui, eique *Dwynnam* alijs *Diwman* Episcopum præfici curauit, teste Beda lib. 3. cap. 21.

WIGORNIA Bedæ, ciuitas Britanniae Episcopalis. *Bocelus*, de quo idem Beda lib. 4. cap. 23. eius sedis primus Episcopus consecratus est à Theodoro Cantuariensi.

HEREFORDIA Ciuitas Episcopalis Britanniae Prouinciali Romano, vulgò *Hereford*. cuius primus Episcopus *Putta* ordinatus dicitur, in peritioribus Britannicarum rerum scriptoribus.

LINDISFARNIA Bedæ lib. 3. cap. 3. Insula ad oram Britanniae, vulgò *Farnylant*. In hac *Aidanus*, fauente Oswaldo Rege Northumbrorum, sedem Episcopalem constituit, eiusque primus Episcopus fuit eodem Beda teste, hinc postea Dunelmum translata est ab Aldwino.

HAGVLSTADIA Bedæ lib. 4. cap. 12. vulgò *Auston*, ad Thinam fluium & Cheuiotæ montis radices in Northumbria sita. *Tumber* huius Episcopus dicitur apud Bedam ibid.

CANDIDA CASA Bedæ lib. 3. cap. 4. quæ & Witerna, vulgò *Weitern*, & latinè nunc oppidum S. Martini, in Gallouidia extremisque Angliæ iuxta Scotiam finibus, inquit Malmesburiensis, sic dicta ab Ecclesia Episcopali ex lapide constructa, cuius primus Episcopus *Ninianus* dicitur apud eundem Bedam.

Addam ORCADES insulas magnæ Britanniae vicinas, quarum *Seruanum* Palladij discipulum primum Episcopum fuisse tradunt rerum Scotticarum scriptores.